

Месяца септемвриа в 28-й день
Преподобных Кирилла и Марии,
родителей преподобнаго Сергия Радонежскаго
На велицей вечерни

Блажен муж: 1-й антифон. На Господи, возвах: стихиры, глас 8.

Подобен: О, преславнаго чудесе:

Буди благословенна, земле Ростовская,/ в малем селении
Варнице/ благочестивую чету всему миру явившая,/ Кирилла и
Марию приснопамятных,/ добрый образ честнаго супружества,/
достойныя родители Сергия Великаго./ Тии бо ныне Престолу
Божиию/ вкупе предстояще,/ молятся о спасении душ наших.
Именитии и славнии/ боярскаго рода наследницы,/ князем
ростовским вернии служителие,/ всехвальнии Кирилле и Марие,/
безвестную Варницу лепоте градстей предпочетши,/ идеже
благочестно поживше,/ воистинну древо доброплодное явистесе,/
плод прекрасный израстивше Сергия Великаго и досточуднаго.
Преподобне отче Кирилле,/ печальника земли Русския
благословенный родителю,/ в годину тяжких испытаний,/
многочастне в стан неверных князем ростовским шествуя,/
благая Отечеству и Церкви/ устроить вспомошествовал еси./
Ныне же в селениях Небесных водворяяся,/ молися Господу/ да
спасет от работы греховныя души наша.

Преподобная мати Марие,/ благочестием и целомудрием
сияючи,/ житием твоим Богу угодила еси,/ Той же сотвори тя
достойну/ избранный сосуд Духа Святаго чревоносити/ и
служителя усерднаго Святыя Троицы миру явити./ Ныне же с ним
в селениях праведных водворяющися,/ молися Господу/ спастися
душам нашим.

Слава, глас 5:

Приидите, вернии,/ похвальными словесы родители Сергия
преподобнаго восславим,/ достохвальную чету, добрейшия
супруги,/ таковому младенцу сподобльшиися быти родители./ Бог
предуготова я к дивному сему рождеству,/ быста бо угодницы
Божии,/ праведницы пред Ним и людьми,/ евангельскому гласу
возследницы/ и всякими добродетельми украшеннии,/ иже и
ныне предстоят Престолу Святыя Троицы/ и молятся о душах
наших.

И ныне, Богородичен.

Вход. Прокимен дне. Чтения преподобническая.

На литии стихиры, глас 3:

В храме стоящей Марии блаженней,/ и глаголы Евангелия
готовей слышати,/ внезапно взыгрися младенец во чреве ея/ и
гласом велиим возопи,/ благовестника Слова Божия себе
предзнаменуя.

В храме стоящей Марии всехвальней,/ прежде даже не певаемей
песни Херувимстей,/ паки во утробе ея младенец возгласи,/ со
Ангелы прославляя/ грядущаго на вольная страдания Христа
Жизнодавца.

В храме стоящей Марии преславней,/ иерею же Святая святым
возгласившу,/ се уже третье возопи младенец во утробе ея,
пророчески себе назнаменуя/ благоговейного служителя тайн
Тела и Крови Господних.

Слава, глас 8:

Что убо отроча сие будет/ в страхе и трепете кийждо друг друга
вопрошаху/ слышавшии трикратное младенца возгласение./ Ты
же, Марие блаженная,/ в знамении сем предзрела еси избрание
твоего чада/ на служение Триединому Богу/ и поклонение Ему в
душе и истине.

И ныне, Богородичен.

На стиховне стихиры, глас 8:

О веры славныя, о любве благия!/ Всечестнии Кирилл и Мария,/
яко же и во дни древния/ Анна, мати Самуила пророка,/ в
служение и дар Богу, Дарователю всяческих благ,/ прежде даже не
родитися их младенцу,/ в совете своем того приносят.

Стих: Честна пред Господем/ смерть преподобных Его.

Богомудрии Кирилле и Марие,/ чадо ваше Варфоломея,/ иже есть
сын радости, нарекли есте,/ той бо воистинну Российской Земли
явися/ радование, скорый помощник/ и преславный чудотворец.

Стих: Что воздам Господеви о всех,/ яже воздаде ми?

Промышлением Божиим водимии,/ преподобнии Кирилле и
Марие,/ в землю Радонежскую преселистесь,/ юже и
добродетельми вашими украсили есте,/ подвиги благочестия
показавше,/ и люди в ней живущия,/ путем Христовым
шествовати поучали есте, блажени.

Слава, глас 4:

В подвизе родительством добре трудившися, святии,/ в нем же и
чада ваша,/ Петра, Стефана и Варфоломея избраннейшаго,/ в
ревностнем служении Триединому Богу/ и Пречистой Божией
Матери воспитасте./ Ныне и нам молитвами вашими помозите,
блажени,/ путем Христовым неленостно шествовати.

И ныне, Богородичен.

Тропарь, глас 3:

Блаженств Христовых причастницы,/ честнаго супружества и
попечения о чадах добрый образе,/ праведнии Кирилле и Марие,/
плод благочестия, Сергия преподобнаго, нам явившии,/ с ним же
усердно молитесь Господа/ низпослати нам дух любве и
смиренномудрия,/ да в мире и единомыслии/ прославим Троицу
Единосущную.

На утрени

На Бог Господь: тропарь преподобным, дважды. Слава, и ныне,
Богородичен.

По 1-м стихословии, седален, глас 5:

Благословенна буди, достойная супружеская чето,/ всехвальнии
Кирилле и Марие,/ матери бо пророка Самуила, Анне
подражавшии,/ и яко та, такожде и вы младенца, аще родится
мужеска пола,/ Богу служити в совете своем положили есте.

Слава, и ныне, Богородичен:

Величия Твоя, Богоблагодатная, кто исповесть?/ Бога бо плотию
родила еси,/ ключи девства нерушимы сохраниши/ и чистотою
богоприятного существа Твоего вся Небесныя силы
превозшедши./ Темже песньми немолчными восхваляем Тя,/
Едина Благословенная.

По 2-м стихословии седален, глас 4:

Страннолюбия добродетель яviste, святии,/ в дому бо вашем на
всяк день,/ вси требующии помощи прибежище и любовь, яже во
Христе, обретаху.

Слава, и ныне, Богородичен:

Милосердия двери отверзи нам, Благословенная Богородице,/
надеющийся на Тя, да не погибнем,/ но да избавимся Тобою от
бед,/ Ты бо еси спасение рода христианского.

По полиелеи седален, глас 1:

Вечная ваша память, достоблаженнии Кирилле и Марие,/ яко в
род и род благочестным житием вашим/ вернии людие спасение
улучати поучаются.

Слава, и ныне, Богородичен:

Упование христианом, Пресвятая Дево,/ Бога, Его же родила еси,
паче ума и слова,/ непрестанно моли с Вышними силами и с
преподобными Кириллом и Марией/ дати оставление согрешений
наших.

Таже степенна, 1-й антифон 4-го гласа. Прокимен, глас 4:

Честна пред Господем/ смерть преподобных Его. Стих: Что воздам
Господеву о всех, яже воздаде ми? Всякое дыхание: Евангелие от
Матфея, зачало 43.

По 50-м псалме стихира, глас 6:

Приидите, вси вернии,/ родители Сергия Великаго восхвалим,/
сии бо в лице святых Земли нашея/ предстоят Престолу
Пресвятыя Троицы/ и прилежно молятся/ о спасении душ наших.
Канон Пресвятей Богородице и преподобным, глас 8, егоже
краегранесие: Прославляю родители Сергия Великаго.

Песнь 1

Ирмос: Колесницегонителя фараона погрузи,/ чудотворяя
иногда/ Моисейский жезл, крестообразно поразив/ и разделив
море,/ Израиля же беглеца, пешеходца спасе,/ песнь Богови
воспевающа.

Припев: Преподобнии Кирилле и Марие, молитвe Бога о нас.
Преподобнаго Сергия, игумена Земли Русския,/ светлостьми
добродетелей возсиявшаго,/ родители сподобистесь быти,
Кирилле и Марие присноблаженнии.

Ревностно храняще заповедь апостола, страннолюбия не
забывати,/ любовью к ближним распалаеми,/ воистину
удостоистесь, блаженнии, Ангела Божия страннопрियाи.

Образу вашего благочестиваго супружескаго жития многия люди
удивишася, преподобнии./ Сего бо ради Бог вас прослави и дарова
плод благославный,/ его же Варфоломея, сына радости нарекосте.

Богородичен: Славим Тя, Богоневесто, рождшую Христа, Бога нашего, / Его же моли помилovati и спасти души наша.

Песнь 3

Ирмос: Утверждей в начале Небеса разумом/ и землю на водах основавый,/ на камени мя, Христе, заповедей Твоих утверди,/ яко несть свят, паче Тебе, Едине Человеколюбче.

Людие чудяхуся,/ егда услышаша трикратное возглаголанье младенца во чреве твоём, Марие приснопамятная./ Что убо отроча сие будет,/ - недоумевающе друг друга вопрошаху.

Аще родится младенец мужеска пола,/ приведем его в церковь, да послужит Благодетелю всех Богу,/ - сие рекли есте, боголюбивии супруги,/ исполненнии веры славныя и любве благая.

Великия милости сподобистися от Бога добронравным житием вашим, блаженнии./ Темже и нам испросите богоприятными вашими молитвами/ оставление грехов, милости Божия и Царства Небеснаго.

Богородичен: Лютаго миродержца сетей избави нас, о Богомати,/ несть бо теплыя Заступницы, разве Тебе, Владычице.

Седален, глас 2:

Прииде, вернии, радостными песньми прославим преподобных Кирилла и Марию,/ и, с любовию лобызающе честныя мощи их, сие возопиим:/ радуйтесь, блаженнии, в боголюбии пожившии, милосердие к ближним имевшии,/ образ честнаго супружества и попечения о чадах явившии,/ смирение стяжавшии и в постничестве пребывшии./ Ныне же, предстояще Святей Троице, молитвами вашими, святии, отечество наше от сопротивных защитите,/ болезни исцелите и всяких искушений избавите / верую чтущих память вашу.

Слава, и ныне, Богородичен:

Не имамы иныя помощи и надежды,/ разве Тебе, Пречистая Мати Божия./ Ты бо Бога плотию родила еси паче слова и разума./ Его же моли, Безневестная, с преподобными Кириллом и Мариею/ подати нам мир и велию милость.

Песнь 4

Ирмос: Ты моя крепость, Господи,/ Ты моя и сила,/ Ты мой Бог, Ты мое радование,/ не оставль недра Отца/ и нашу нищету посетив./ Тем с пророком Аввакумом зову Ти:/ силе Твоей слава, Человеколюбче.

Яко же святыи Предтеча възграся радощами во чреве матери своя,/ тако и сын твой, Марие преподобная, възграся во утробе, молящейся ти Господу в церкви./ Ты же, страхом и трепетом объята бывши зывала еси:/ силе Твоей слава, Человеколюбче.

Юдоли плачевней причастницы бывше,/ обаче подвиг супружества преславне совершивше и во иночестве поживше, преподобнии,/ ныне наслаждается Небесныя трапезы./

Молитесь ко Господу, да умудрит православныя супруги во благочестии пребывати,/ иночествующим же ревностно обеты соблюдать.

Радости исполняются днесь россиястии собори,/ имущи вас,
блаженнии, теплыя молитвенники/ и усердныя заступники
своему земному отечеству.

Богородичен: О, Всепетая Мати! О, мира Спасение!/ Не остави
верою Тя призывающих,/ Ты бо еси Заступница усердная рода
христианского.

Песнь 5

Ирмос: Вскую мя отринул еси/ от лица Твоего, Свете
Незаходимый,/ и покрыла мя есть чуждая тьма, окаяннаго,/ но
обрати мя и к свету заповедей Твоих/ пути моя направи, молюся.
Днесь память ваша, блаженнии, созывает люди на духовную
трапезу./ Темже сподобите и нас достойно сия вкусити,/ да и
пищи райския во обителях Отца Небеснаго вкупе с вами
насладимся.

Имуще житие благочестием сияющее, достославнии, родителие,/
воистину древо благословенное явистесья,/ плод прекрасный
израстивше.

Теплоту вашей любви к Богу, праведная чето,/ и ревность к
иноческому житию восприят сын ваш, Сергей достохвальный,/
навыкая добродетелем и служа вам до блаженнаго преставления
вашего.

Богородичен: Едину Чистую, едину Благословенную, вернии,
ублажим,/ к Сыну бо Своему милостивно руке простирает,/ да
обратимся к свету заповедей Его и пути наша исправим.

Песнь 6

Ирмос: Очисти мя, Спасе,/ многа бо беззакония моя,/ и из
глубины зол возведи, молюся,/ к Тебе бо возопих, и услыши мя,/ Боже
спасения моего.

Летняя ваша память веселит сословие иноков, преподобнии
Марие и Кирилле./ Воистину блажени есте, яко имена ваша
прославляются с сыном вашим, Сергием преподобным,/ его же
величают игумена Земли Русския.

Истину в житии взыскующе, преподобнии,/ о телесных небрегосте
и земная преобидесте,/ темже, мира отрекшесья, во обитель
Хотьковскую вселистесья,/ идеже в подвизе иночества добре
почисте.

Сохраните от зол вашими теплыми к Богу молитвами,
преподобнии,/ всех, жительствующих во обители вашей,/ ей же
вы начальницы и покровителие.

Богородичен: Его же родила еси, Сына Твоего и Бога,/ молити не
престай, Богоневесто,/ да избавит обитель Твою от всякаго зла и
спасет души наша.

Кондак, глас 4:

Днесь, вернии, сошедшесья,/ восхвалим двоицу блаженную
благовернаго Кирилла и Марию добронравную,/ тии бо молятся
вкупе со возлюбленным сыном своим, преподобным Сергием,/ ко
Единому во Святей Троице Богу,/ отечество наше в правоверии
утвердити,/ дома миром оградити,/ юныя от напастей и

соблазнов избавити,/ старость укрепити / и спасти души наша.

Песнь 7

Ирмос: Божиа снизхождения/ огонь устыдеса в Вавилоне иногда./ Сего ради отроцы в печи, радованною ногою,/ яко во цветнице, ликующе, пояху:/ благословен еси, Боже отец наших.

Рака мощей ваших днесь чудеса источает/ верою притекающим к вам, блаженнии, иже и воспевают:/ благословен еси, Боже отец наших.

Град Москва и окрестныя грады и веси/ прославляют вас своя избавители от напрасныя смерти и целители от смертоносныя язвы./ Сего ради днесь, яко же прежде спасайте почитающих вас, преподобнии.

Измлада тяжкою болезнею одержима,/ девица некая внезапное исцеление прият вашими и сына вашего к Богу молитвами./ С нею же и мы благодарственно взываем:/ благословен еси, Боже отец наших.

Богородичен: Яко Деву и едину в женах, безсеменно рождшую Бога плотию/ прославляем Тя, о Богомати,/ и таковому Божию смотрению удивльшеса, взываем:/ благословен еси, Боже отец наших.

Песнь 8

Ирмос: Седмерицею пещь/ халдейский мучитель/ богочестивым неистовно разжже,/ силою же лучшею спасены сия видеви,/ Творцу и Избавителю вопияше:/ отроцы, благословите, / священницы, воспойте,/ людие, превозносите во вся веки.

Воспойм, вернии, всечестную двоицу, Кирилла и Марию богоблаженных,/ от них бо возсия нам Сергий досточудный,/ украшение Церкви Православныя и монашествующих утверждение.

Единоумдрени и единомушни добродетельми бысте, целомудреннии супрузи./ Помозите нам в чистоте и святости житие провождати,/ вас бо теплыя ходатаи к Богу стяжахом. Любовь Христову, яже есть твердое основание супружеския жизни,/ со тщанием, блаженнии, хранили есте./ Сего ради молим вас:/ помозите супругом православным в любви сей пребывати/ и домом их благословение Божие стяжати.

Богородичен: Избави нас от бед и многих соблазнов, Всенепорочная,/ Тебе бо вси стяжахом прибежище и утверждение и спасение душ наших.

Песнь 9

Ирмос: Ужасеса о сем Небо,/ и земли удивишася концы,/ яко Бог явися человеком плотски/ и чрево Твое бысть пространнейшее Небес./ Тем Тя, Богородицу,/ Ангелов и человек чиновачалия величают.

Како ублажим вы, предобрая двоице!/ Какое прославим благое сопряжение!/ Аще и земнии бысте, но Небесных достигосте, блаженнии,/ идеже Святей Троице предстоите и молитесь спастися любовию вас почитающим.

Ангельски на земли поживше,/ ангела земнаго и человека
небеснаго, преподобнаго Сергия, миру яviste, святии,/ ныне же со
Ангелы вкупе водворяется/ и с ними Трисвятую песнь Богови
воспевае.

Господь обитель Хотьковскую вами прослави, преподобнии
иноцы,/ ею же Церковь Русская украшается и вам сице вопиет:/
радуйтесь, всехвальнии, отечеству нашему твердии заступницы.
Богородичен: О, великое заступление печальным, Богородице!/ О,
милости пучина и миру Покров!/ Все упование на Тя возлагаем,
сохрани нас под кровом Твоим.

Светилен:

Радуется днесь светло Церковь Русская,/ почитаючи память вашу
пречестную, Кирилле блаженне и Марие достохвальная./ Вами бо
образ веры и благочестия показася/ и светильник отечеству
нашему, Сергей преподобный, явися.

Слава, и ныне, Богородичен:

Яже Свет Божественный неизреченно рождающая,/ омраченных нас
прилогами лукаваго и в лености живущих просвети,
Всепорочная,/ и настави к добродетелем, яко всех благих
Подательница.

На хвалитех стихиры, глас 4:

Приспе днесь праздник преподобных Кирилла и Марии,/ радости
духовныя исполненный,/ приидите, российский собори,/ светло
торжествуем,/ и сих хвалами и песнями почтим:/ радуйтесь,
Небеснии человецы и земнии ангели,/ Земле Российския
заступницы и хранителие,/ и молитвенницы о душах наших.
Заповедь страннолюбия соблюли есте, святии,/ людем бо в
путьшествии сущим,/ дом свой прибежище являете./ Ныне же в
Небесных чертозах пребывающе,/ нам, в странствии жития
сущим/ в крове Бога Небеснаго помозите водворитися/ вашими
молитвами, блаженнии.

Добродетельми сияюще,/ благочестно в мире пожили есте,/ святе
Кирилле и преславная Марие,/ смиренномудрием и чистотою
украшенная./ Ныне же ходатаи к Богу будите о отечестве вашем/
и грехов оставление испросите/ чтущим любовию святую память
вашу.

Блаженства непорочных вождевшие,/ путем заповедей
Господних текосте/ и, суеты житейския избавитися хотяще,/ во
обитель Пресвятыя Богородицы вселистеся,/ идеже земное
странствие скончавше,/ Вышняго Сиона достигосте./ Молитесь о
нас, преподобнии,/ причастие Небеснаго Царствия и спасения
душ наших улучити.

Слава, глас 8:

Приидите, празднлюбцы, / песнями духовными благочестно
восхвалим/ честную двоицу, благочестивую чету,/ Кирилла и
Марию приснопамятных,/ иже во обитель Хотьковскую
притекше,/ идеже и вечное упокоение обретоша./ Днесь же, раце
мощей их молитвенно предстояще,/ яко покровителем и

начальником обители сия,/ вкупе вси согласно взываем:/
радуйтесь, преподобнии Кирилле и Марие,/ обители Хотьковския
преславное украшение.

И ныне, Богородичен:

Владычице, приими молитвы раб Твоих/ и избави нас/ от всякия
нужды и печали.

Славословие великое. Ектении и отпуст.

На Литургии

Блаженны от канона песни 3-я и 6-я. Прокимен, глас 7: Честна
пред Господем/ смерть преподобных Его. Стих: Что воздам
Господеву о всех, яже воздаде ми? Апостол к Галатам, зачало 213.
Аллилуия, глас 6: Блажен муж, бояйся Господа, в заповедех Его
восхощет зело. Стих: Сильно на земли будет семя его. Евангелие
от Матфея, зачало 10. Причастен: Радуйтесь, праведнии, о
Господе, правым подобает похвала.